

Dr PfannehOuer 2004

SOili

Mis Söili hett ou hüür ke Schnuuf
Es chömm eifach ke Fasnachtsschtmig uuf
We d Schtadt ke Polizei törf ha
De lohn sech's nümme ga d Sou abzlah

POint

Dr Villiger wott als letschts uf Ärde
No literarisch tätig wärde
Nei, nid Schnitzelbänk, das gäb e Schmarre:
Dä würd no bi de Pointe schpare
*Kunscht elei cha's doch nid si
Drumm schtigt er no bi Nestlé ii
Als Kassewart weiss är genau:
Es längt nid mit dr AHV
So hett er ou bi'r NZZ
Und bi swissre je e Schtei im Brätt
Gniesst si Alters-Anonymität
Drfür hei dert d Verwaltigsrät
Jitz Literatequalität*

BOumfahrtner

Dr Schtapi wott, tuet me mir prichte,
schiints uf si Pension verzichte
Är fahri besser, seit är chalt,
wenn d Schtadt ihm d'Outokasko zahlt.

SchnarchäOlogie

Uderem Bundesplatz da ruihts hebräisch,
ir Bundesgass chrischtlech-patriziäisch.
Ig wünsche beidne guete Pfuus,
wie däne dinn im Bundeshuus

PrO Obrigkeit

Das Fötteli zeigt akkurat
Grosatt u -müeti Bundesrat
mir setze das als Synergie
grad für d Pro Senectute ii

FrOuepOwer

Frou Dokter seit bim thé dansant:
"I cha das Gjammer nid verschtah,
Mir Froue si i däne Jahre
Mit emne Merz no gäng guet gfare"
*Und gäbe d Froue äntlech Gas,
seit Merz: "Ich übername das"*

WOsserfOllen

Der Wasserfall wott's witter tribe
Är plant e Gmeindrat 1 schtatt 7
Für das, wo dä üs wott aatue
Si 200'000 gar nid gnue
*Dih, wär nid no es Jöbli frei,
als Erzbischof vo Bluemeschtei ?*

VOrschau

Dr Wasserfall tröchnet plötzlech uus
Fuchs u Schori hei sech druus
D Frou Begert blibt, dr Krach blibt färr --
Eh, wie heisst dä Film ? "Ds Wunder vo Bärn" !

SchOner WOhnen

D Frou Frösch wohnt ire schöne Schtadt
Dr Schtapi hetts inzwüsche satt,
Si trätte n'ab, die Wohnigs-Niete
He, Kurt: Wotts choufe oder miete ?

LÖcher

Wär budlet so bim Casino ?
Im Neuföld und i dr Altschtadt oo ?
Vorem Bundeshuus und -- jä verfluecht:
Isch das dr Bush, wo Waffe suecht ??
*I ha scho, hett dr Bush sech bsunne,
Mit fautsche Löcher d Wahle gwunne*

POLizei

Hallo, hie Bärner Polizei,
Verdeckti Fahndig, Schtuefe drei,
Wär wott genau mit was für Frage,
Dass mir die Name-Schildli trage ?
*Ds Söili findt, mi sötts la blibe
äs wüsst ou nid, was uf ds Schildli scribe*

O Thomas

Bümpliz seit zu Bärn: "Madam,
Mir wei ke Begert u kes Tram
Wenn öppis üs i Wäg isch cho
Hei mir no gäng dr Fuchsschwanz gnoh
*D SVP seit: d FDP ! D FDP seit: Nei, d SVP !
Mi seit zwar beidne "bürgerlech"
I säge ender: würgerlech*

O-tOn

Mit SOS chunnsch knapp drdür
Mit POS chasch nüüt drfür
Mit SM wirsch sexuell bizarr
und mit SMS Swiss Music Star

KOMmunikatiOn

Zmittst us dr Elektronik-Mäss
Schickt är sim Schatz es SMS:
"Dis Handy isch de doch nid gschtole,
I ha's im Sack, chasch es cho hole"
*Pro Tag gitts bis zu vierzg Millione -
d Schwizer muesch nid mau meh klone*

NEAT-ROhren

Dr NEAT-Oberboss Finanze
Schtigt usem Schtolle mit Schtoub am Ranze
Und süfzt: "Mir chöme nid vom Fläck
Wohär das chunnt, isch klar: Meh Dräck !"

NatiOnalra-uchverbOt

Chöi Nazionalrät, wo tüe lüngele
Jitz ir Wandelhalle gsüngele ?
O we kes Röichli meh dert züngelet
Wird gäng no gküngelet und gchlüngelet
*Itz chunnt dr Rouch im Bundeshuus
Nume no zur Schnure n'uus*

VictOry

Dih, i weiss gloub, was dr Achermaa
Hett gseit bim Finger ufehaa:
"Gäu, das isch e müede Huufe,
Chumm, mir göh zwöi Bier ga suufe"

www.yähüü

Jühüi, hütt gä n'ig nid i ds Bett
I fiire ä-ö-ü im Internet
Ha mi la überzüügele
Statt "google" gitts hütt güügele